

筆記小說大觀

集

夜譚隨錄

閑齋氏著

第二冊

進步書局校印

宋
紀
元
統
天
曆
二
年

友
年
隨
錄
一
年
一
月
一
日

夜譚隨錄卷之二

霽園主人閑齋氏著

葵園主人蘭岩氏評閱

修鱗

山左梅和鼎客潮陽。糴糴致富。娶妻納妾。買僮僕。蓄婢媼。置田宅于白雲坊。遂家焉。然富而不驕。不吝。性儻。好施與。異鄉客有落拓不能歸者。苟一告急。無不應之如響。以故人欽其高義。而弗忌其多財。梅暮年能甘寂寞。居恒無所事事。闔宅後隙地數畝。結構一軒。左園右圃。嶺南地暖土肥。插竹數日成林。植樹彌月垂蔭。復疊石為山。穿沼蓄魚。奇花異卉。足以自娛。東隣有修鱗者。為郡諸生。少失怙恃。三十未婚。爨烟屢絕。而處之泰然。梅重其品行。常通慶弔。而修生從不向之搖尾。梅或偶供廩給。必力辭不受。即強而後可。亦必宛轉報復。適敵其數而至。梅數曰。古人一介不輕取予。吾于修君信之矣。自是益敬之。會夏日。梅淪茗納涼。暴雨驟至。承霽如傾。逾時雨霽。蟬螭在東。忽報修先生至。梅驚喜出意外。謂高士履齒。來破苔紋。殊足為交遊光寵。倒屣迎之。握手甚歡。修匆匆作寒暄語。即目視假山。咄咄稱怪事曰。此其定都山乎。山東北十數武。有巨石橫卧。修度其方向曰。所謂大石國也。於是循假山而南。得魚沼。沼西岸見蟻封。高二三寸。指示梅曰。此東海。此蚺蜢國也。復蹲身沼畔。拂花撥草。

若有所覓。梅從旁不測所為。但接踵追隨。行云則行。止云則止。方匿笑書癡作用。迥不猶人。既而修覓得一物。愕然曰。果有是哉。梅就視之。則枯鮒一尾。長三寸餘。蛙已過半矣。修却步。把梅手。還至假山下。繞石搜索。見羣蟻營穴。銜土出入不休。瞿然若有所失。佇立咨嗟。潛然泣下。梅致詰其故。修嘆曰。事極奇異。請入軒為丈人詳告之。梅懷惑殊甚。及聞修備述其異。梅廢然良久。頓悟身世。相與談禪論道。為方外交。後共入羅浮山採藥不返。梅仲子蟠根。從鄞江上官周學畫。故其先人及修生事。上官知之極詳。予聞之。喟然曰。此南柯之續也。請誌之。先是修生獨居一室。旦夕攻苦。蓋銳志於功名者。一日倦讀。當北窗午睡。朦朧間。見一黑衣人。排闥入。長寸許。促修速起。使臣持節至矣。修方欲致詢。其人已出。修逡巡下榻。自覺身已暴縮。錯愕間。彩仗已列滿階下。持節者。衣冠皆非時制。侍衛甚都。傳呼曰。蚍蜉國王召修鱗赴闕。可即就道。修再拜辭謝曰。草莽微臣。無往見之義。詎敢應旌旂之召。致乖羔鴈之儀。使臣曰。王以先生賢者。禮當就見。恐致踰垣。故使近臣元蚬。恭御蒲輪。代將白璧。望先生幡然應聘。惠辱海邦。草野涓濱之事。唯先生之所熟聞。而箕山潁水之風。非寡君之所敢望。修再三謙讓。然後受命。左右進冠服。掖之升車。人馬紛紜。循階而行。約行數十里。甫抵西牆下。陰念牆西即梅氏園矣。行來何覺太遠。疑心滿腹。第無如之何。姑聽之。俄牆下闢一城門。樓

堞畢具。榜曰東關。石磴百餘級。前驅旂鼓。按部而入。有數人跪道左。曰關吏祗候矣。入關。息駕館驛。鋪陳極華美。水陸饋餉無算。唯與元蚡對享。翌日出關。關吏請扈從。元蚡頤指曰。免氣象尊大。修知其為國之貴臣也。日中抵國門。王郊迎三十里。冠紫金冠。衣赤錦袍。披素羅鶴氅。貌甚奇偉。執禮甚恭。修下車趨拜。王答拜曰。祖宗靈爽。得先生辱臨敝邑。惟是敝邑之社稷。實有賴焉。先生不遠千里。必有以教寡人。寡人雖不敏。悉舉封內。惟先生之命是聽。對曰。臣學識短淺。性癖山林。既乏夷吾富國之才。詎有景畧匡時之志。不意禮隆三聘。濫叨絲馬之加。敢不力贊一籌。勉效涓埃之報。王大喜。載以後車。告諸太廟。爵為上卿。軍國大事。胥取決焉。修素談經濟。一旦置身通顯。鞠躬盡瘁。夙夜酬知。乃請命出巡。徧歷郡縣。沿海四十餘城。各審其山川形勢。親繪輿圖。其國西負連山。東濱巨海。長林大澤。廣斥無邊。四境分為大鎮。置使相。各轄六七城。皆宗臣領之。其人好勇多力。其俗尚意氣。喜游獵。向南八百里。有都會。名大石國。其風慄悍。樂於戰鬪。國人畏之。修周巡半載。悉了然於胸中。歸國復命。退而上疏曰。臣奉命巡視封疆。往返數千里。經歷四十城。郡縣無秦之酷吏。邊關皆漢之嫺姚。三老興歌。萬民安堵。太平有象。如此可徵。第古之聖君賢相。安不忘危。治必防亂。強隣孔通。常如虎視之眈眈。鄙俗相沿。不翅狼貪之逐逐。伏乞防微杜漸。易俗移風。黽勉羣工。以臻上理。

疏入。王優詔答之。居無何。大石果入寇。鎮南都護司空元蚡告急。王加修太宰。賜上方劍。命監元蟬元蜎軍。督西南二鎮兵萬八千以禦之。修出奇兵繞出敵後夾攻。大破之。俘虜數千。擒其裒帥大石懼。上表請藩。曰。修帥神人也。南人不復反矣。修諭以利害。盡歸其俘。及凱旋。王犒師於紫茵之宮。工歌采芑。以饗將士。以修為右僕射。兼侍中尚書令。平章軍國重事。尚施花公主。賜甲第一區。金玉錦繡。賞賚無算。修安享四十年。五子三壻。皆為顯官。勢力煊赫。會海濱有巨魚。潮落失水。王命貴臣元蚡率全國之民。往取厥魚。魚長百丈。頭尾如山。國人搶攘彌月。僅移百里。修上疏諫止。以為竭民力。以縱口腹之欲。非盛德事。請罷其役。王召修面諭之曰。夫學貴流通。而忌拘泥。若夫戾人情而乖時務。王安石所以非殺時宰相也。我國人情風土。相國蒞治數十年。豈尚未之深悉耶。高原磽瘠。下隰斥鹵。民不耕而食。賴游獵以為生計。巨魚出水。是天賜豐年。羣臣皆賀。而相國獨有異議。得毋人情時務。猶有未嫻乎。修見所言不納。怏怏而退。一日。太史元龜奏山蒸土潤。主有大水。王大驚。議遷都以避之。鎮北都護甯朔侯侍中元矯上言。積石山高遠深邃。堪可經營新邑。王大喜。命修往相宅。修奉命至山。相其陰陽。度其原嶽。見山童水遠。深以為不可。封章馳奏曰。臣奉勅相宅。周視名山。禹蹟無存。河源殊遠。乃疆乃理。非同亶父之岐。常邑常甯。詎等盤庚之亳。竊思舊都鞏固。負山

海以稱雄。數代承平。通魚鹽以為利。不如緩爰有衆。莫敢攸居。黃門以事關重大。非時轉奏。王覽奏歎曰。書生之見。胡不遠大如此。即批答曰。伋來以圖及獻卜。知相國思深慮遠。足見忠愛。惟是都城濱海。水患堪虞。如遷都之議一梗。則通國之民皆魚鼈矣。茲更使中書令元蚡為相國輔。速定新都。寡人率宮嬪臣民。行當就遷矣。修得詔默然。元蚡至。乃相與於山之南麓築城垣。建宮室。開闢闔閭。葺民居。連夜興作。工粗竣。王已徙都中。十餘萬戶陸續而至。修大驚。遮道而諫曰。王奈何輕棄根本之地。獨不慮敵國外患。乘間竊發耶。王降輿慰勞。改積石山曰定都山。以修為故都留守。晉爵定都公。修拜命即行。公主及諸子皆不預聞。從人半路多亡去。殊深憤恚。及抵舊都。見萬井一空。益憂憤。仰天歎曰。不意竭忠盡力。反為逐臣。王陽厚陰疎。可謂智足以拒諫矣。孤臣戀戀。復欲何為。不如解組歸田。遂我初服。名利場中。非復我側足地矣。因懸綬國門。單騎出關。關吏叩馬問相國將何往。修具告之。吏曰。相國忠則忠矣。然而趨吉避凶之理。未之深晰也。拘拘於不遷之議。而使數百萬生靈。盡葬魚腹。相國詎忍見之乎。修曰。流言飛語。何足憑信。吏曰。請相國少留八日。當見災異。王之心可明。相國之怨諒亦可少息矣。修本不捨王。乃停驂焉。居三日。天地陰晦。大雨如傾。浹旬不止。平地水深數丈。樹頭牽夫藻荇。舵尾壓於樓臺。駭目驚心。聲如萬馬。關城地高。猶浸三版。修始信遷

都之計非友。乃西向再拜而泣曰。臣負王心矣。縱王不見譴。臣何面目復見臣民乎。言訖。擲撲頭於地。躍身赴水。洶然一聲。午夢忽覺。依然身卧桃笙。夏雨初歇。簷溜猶滴。蹶然而起。自訟奇奇。躡履出戶。緣階而行。冥想夢中去路。依稀可認。尋蹤至西牆下。花甎缺處。有小穴。大如錢。恍似東關形勢。對穴窺之。則梅之魚沼假山。厯厯可辨。穴口有游蟻出入。方悟四十年功名富貴。皆夢中蟻國。幻化而為之也。

聞齋曰。梅慷慨修耿介。皆仙品也。故不學仙而入仙籍。習見世人於忠孝根本之地。及一切福田。皆荒蕪不治。而功名富貴聲色貨利之場。中熱如燒。及稍不如願。輒妄欲學仙。其實七情六慾。觸緒紛來。雖有彭咸在側。前推而後挽之。恐一步行。萬不敢其一步却也。

蘭若曰。四十年功名炫赫。轉成二夢耳。拘迂見斥。總不免書生之見。修生不達時。修生乃悟道矣。

來存

予家老僕來存者。李姓。德名。潘陽人。善國語。性情直。有膂力。少壯時。嘗負販於蒙古諸部落。其人情風土。知之甚悉。而所遭怪異。數見不鮮。予從家君扶祖觀自閩入都。於仲家淺泊舟三日。候放開。夏夜苦熱。披襟坐船頭。對月當風。向李詢塞外風景。及所見聞。李因言其客喀

爾喀時。其人騎獸似鹿而非。有語言。無文字。亦無機械。如遊。循蜚。因提之世。其俗無主客。客至張幙。輒走乞。蕉食。坐而貽。脾脯醢。齎與之。乃去。客至其幕。徑入啜。且啖。夜宿氍毹前。主代救。不償。予顧之曰。視爭鬬。搆訟。折產。鬪牆。行百里者。必腰纏。惠一餐者。有德色。大懸殊也。杭靄山之西北。地名陀羅海。即振武軍駐防處。近黑道故寒。七月雨雪。五月始釋。山之巔。六月不釋。築土為屋。屋內冰糊數寸。氍毹暖。匠早起。被池堆霜。出門數步。凌封氍毹。手僵不得呵。耳鼻窻窻有聲。或爛且脫。幸風自東南來。夏風始反。不爾凍且死。然南人至此地。亦罕有凍而死者。予笑曰。世無不可鍊之人。人無不可歷之境也。陀羅海苦寒矣。而不苦飢。茶一斤易一羊。十斤易一牛。中國人至彼。恣烹炙。饜腫腳。頭蹄滿衢。血骨徧地。迴思羹藜藿飯。糲粱。茲誠樂郊矣。所惜冬苦寒。否則誠樂。予嗤之曰。得隴望蜀。人之心無止期也。角缺齒豐。天與人無全境也。似麋而大者。曰堪達爾汗。疑其即麋也。前昂後低。多力。毛粗而長。為裘煖。角扁而厚。為決良。人以其皮可裘。而角可決也。馳馬彎弓。逐而殲之。獲厚利。予蹙然曰。夫皮所以庇角。所以衛也。今乃知庇身者。適以庇人。自衛者。反以自斃。是可悲也。李曰。其脣方大而厚。多膏。味極美。八珍中有猩脣。即此物也。以角試水。毒則角綠色。又有掃雪者。大於貂。絨白毫長。光遜之人。制為冠。以其似貂也。予嘗考漢制。珥貂侍中。左右常侍。我朝制大臣衣貂。近臣

亦不禁。美觀云乎哉。誠以貂夏冠而冬絨。其操似松。內勁而外溫。其德似玉。然則苟非其人。人將賦鵷梁馬。真弗貴也。况履乎。有木曰查克。產推河。似絲柳而不垂。耐霜雪。堅而且材。灼為炭。置徑寸於爐中。數日始盡。治產難。亦治心痛。然大者拱。高者尋。風斯拔之。蓋地沙且鹹。根難據而易朽也。予歎曰。豈無美材。生非其地也。惜哉。戈壁即瀚海也。內多奇石。石之色大者如馬肝。小者如珠如玉。如瑪瑙珊瑚蜜蠟金。中虛而外朗。起膈紋。皆馬肝石所孕也。初剖之。癩日炙雨濯。風掃霜雪浸。剝落盡。則光璀璨矣。予豐然曰。異哉。天之剝落之者。乃所以璀璨之也。亦有木焉。一木而萬木之葉皆具。名曰枹。以其冒全材而實不成一材也。予曰。獨木也乎哉。問其地有酒乎。曰有。穀穀捫醢而蒸之。曰阿拉氣。薄甚。唐人所謂千鍾不醉人者。阿拉氣釀。取斗曰阿拉旃斗。取升曰科爾旃升。取合曰波羅搭拉蘇。一名哈喇。以次厚合。又取龠曰賒爾旃。則龠敵斛矣。予莞爾曰。是其釀與治同也。治鍊形。釀鍊氣。鍊至多為至少。故能以至少勝至多。雖然。此難為舖糟啜醢者道也。聞其地亦產良馬。汗不血。中國人以地非大宛。貌非汗血也。未有過而問者。昔者夫子稱驥以德。後人稱駃騠稱腰裏以力。今舍德與力。而以地與貌。是紫燕白兔。伏櫪而嘶寒風。九方歎執靶而笑者也。李又言其於康熙五十二年。由喀爾喀至巴里坤。其地有獸似猿非猿。似猴非猴。中國呼為人同。甘涼人呼為野人。番

人呼為噶里。往往窺伺宮廬。見人飲食。輒乞其餘。或竊取烟具小刀之屬。為人所見。即棄擲而奔。殺之不忍。逐之復來。胥無如之何。嘗狎一人同。每羹豆樵汲等事。喚之悉能任使。至其寢食。雖不能言。頗能察色。居一年。治任將歸。啾唧馬前。捉銜掇鐙。淚下如瀉。李亦為之酸鼻。相從十餘里。麾之不去。乃囑之曰。汝之不能從我。至中國。猶我之不能留居此土也。可止矣。若再行數里。將迷途不得返矣。人同始悲鳴而去。予聞之愕然而訝。喟然而嘆曰。天地之間。人為貴。非五官之謂也。先官而具曰五常。後官而合曰五典。傳官而行曰五事。官而不事。又無典常。不則人將獸之。若之何獸也。而人之同之。雖然。三五偕而後為人。人也可不慎歟。

蘭岩曰。逐段具有至理。奈人之不能參透者多。何哉。

雜記五則

吾聞狐之類不一。有草狐。沙狐。元狐。火狐。白狐。灰狐。雪狐之別。或曰。是獸獸者。年老則妖作。冠枯顙。衣擗帶。幻人形。此物為害百出。焚山挖穴。挾矢族廬。亦其族。庶幾妖絕矣乎。而不知是能為妖。非必為妖也。偶為妖。非盡物皆為妖也。且夫狐之妖有數。而物之妖無窮。裸蟲鱗介花木。廟中偶。窖中金。是物皆能妖也。物之妖以夜。而人之妖則以晝。脅肩諂笑。假虎憑城。翠眉紅裙。朱衣白面。斯人無非妖也。奈何獨欲赤狐之族乎。傳曰。妖由人興。人事盡。則妖

端絕矣。於狐何尤。或曰。老而妖者名狝狐。又名靈狐。似貓而黑。北地多有之。蓋別一種云。予與諸同學偶談及狐怪。擇尤者五則。記之。

貴筑劉紫來。昱東。肄業滿主。于昌邑。胡輝岩之山東會館。中秋夜。聚飲於南樓下。在座者海陽鞠慕周莊行。胡岱峯子翼。貴陽鄢敬齋維肅。薛魯園廷楷。並予與主人。相與說狐。予舉紅姑娘事。咸以為異。紫來因述其客山右時。聞一富室家多狐。往往幻形為祟。驚怖家口。或作佝僂老人。獨步廳上。或作老嫗。持枵杖出入倉厨。或作覘妝少女。倚門闚市。顛倒行人。又於壁上。忽現樓臺。及郭郭雉堞之類。愈出愈奇。雖不害人。而其家頗厭苦之。主人有女所居隣佛堂。堂中有壘數十。蓄酒甚多。戶常扃鍵。女日暮歸寢。與侍女過佛堂下。聞堂中漉酒聲。窺之。見二曲背嫗。就罍盜酒飲。且飲且爭。少焉一嫗大醉。酩酊之態。殊覺可笑。女不禁嗤然失聲。嫗聞之。愠曰。何與爾了頭事。吃數盃酒耳。何笑之有。侍女應聲曰。見人偷酒。吃得如此醉。焉得不笑。嫗怒。大聲詈曰。遮莫來撩撥爾祖妣。我將齧爾爹黑鳥。女聞其言穢亟避去。侍女不堪其罵。獨立窗下。痛詆之。飛瓦忽至。傷脣擊落二齒。大痛而奔。隨聞堂中太喙。主人聞之。戒家人勿多言。一夜無事。次日主人早起。見枕畔一物。默然審視之。一男子勢也。血色尚新。大駭。恐閨人見之。潛以火箸夾取置溷中。聚僮僕察之。悉無恙。時侍女之父。從一縣令在河南。

方狎一伎。一夜伎忽來就。相與共寢。鼾睡間。私處痛如刀割。大呼暈絕。同人驚起來探。已失勢之所在。伎已不在側。咸以爲異。白於官。拘伎訊鞠。伎言昨夜與諸女伴作葉子戲。通宵不寐。實不知情。竟成疑案。使人送之還鄉。雖不致死。然已閹廢。主人無如之何。亟徙居以避之。始獲甯宇。蓋侍女父失勢時。即主人枕畔得勢時也。侍女張姓。其父色黑。號黑張。故狐有黧黑鳥之說云。

聞齋曰。吾聞狐性極淫。故名曰淫狐。乃其報冤。亦出於淫。可謂好名之甚者矣。夫名者實之賓。狐之淫。發於其性。是先有其實。而後名附之。狐豈爲淫乎。然則世之名過其實者。曾淫狐之不若也。

蘭岩曰。自盜酒而反殃及人父。此狐非但不仁。抑且無趣。殆所謂老羞成怒者耶。

胡輝岩謂貴筑蔡孝廉博雅士也。嘗向輝岩述其鄉人褚十二。少從其外祖顧明經遊巴蜀。假館於臨邛羅氏。羅固巨族。累代爲顯宦。後世雖漸凌替。而第宅閼深。園亭幽勝。猶甲於一鄉。羅二子一姪二甥。並受業於顧。褚亦附學其間。褚與羅之甥秦生者。相交莫逆。同設榻於園之西軒。居半歲餘矣。時當秋月。值羅次子畢婚。顧連日困於酒食。秦亦理事甚忙。褚獨步軒中。深苦岑寂。抽書破悶。漏二下。秦生攜酒盒來。與褚小酌。曰。逐日碌碌。未遑晤對。今宵稍

暇聊具杯酒。與子談心。於是屏僮僕。扃園門。挑燈細酌。頗極歡暢。褚浮白曰。人生行樂耳。須富貴何時。秦笑曰。偃臥飲河。不過滿腹。徒飲豈足以為樂。予有一妙人。兄如見之。當思老於鄉矣。褚問為何如人。秦支吾不以實告。力叩之。秦始小語曰。予下榻此園。二年於茲矣。嘗交一麗人。年甫十七。兄到後。踪跡稍疏。然每際花月之夕。或值兄醉夢之時。未嘗不把握也。以兄待我厚。故敢洩肺腑事。幸兄勿復洩於人。褚曰。慮弟相戲耳。如果然。則非狐即鬼。烏可親暱。秦曰。誠為狐。非鬼也。狐而色比宓妃。才同謝女。何不可親暱之有。褚終屬少年。血氣未定。且被酒興高。力求一見之。秦有難色。褚款語相央。至於屈膝。秦莞爾曰。見之亦無不可。第未卜麗人許否。姑試之以觀兄之緣。乃起身繞出迴廊。湖山下。輕聲喚憐姐者三。於是女子分花步月。冉冉而至。丰姿綽約。美麗非常。目所未睹。著碧羅畫衣。曳練裙。秋波流慧。蓮靨生潮。含羞晚褚而責秦曰。小酸子。謂我不敢見此書癡耶。褚面頰口訥。勉強揖之。秦曰。褚。十。二。兄。面。嫩。憐。姐。勿。笑。之。女。曰。此。非。面。嫩。乃。良。心。現。也。豈。似。爾。天。良。盡。喪。也。毫。不。知。羞。恥。哉。乃。相。與。入。軒。見。酒。具。笑。曰。二。酸。子。人。家。兒。子。娶。婦。此。際。正。好。捫。撝。爾。等。乃。收。取。餽。餘。滋。潤。嚙。吻。恭。喜。今。夜。得。兩。枚。飽。噍。矣。秦。曰。既。不。能。作。東。道。主。奈。何。相。嘲。女。曰。爾。誠。旅。店。蠶。蟲。欲。謀。食。客。矣。適。從。六。姊。處。食。羊。桃。留。得。數。枚。出。以。奉。人。可。乎。秦。曰。甚。妙。女。因。手。袖。中。出。一。金。鑲。椰。瓢。盛。

羊桃五枚。鮮如初摘。蜀中固無是物。不測所自。二主分食甚甘。既而珍饌芳醪。悉於瓢中出之。羅列滿案。酣飲間。忽目褚曰。觀子芳姿淑質。自足撞破迷樓。第千葉桃花。早榮早落。華而不實。理有固然。會須行樂及時。何可株待。於是笑言欵洽。游語漸侵。褚神迷不能自主。秦從旁頗形妬色。女睨之而笑曰。小酸子。真是醋葫蘆矣。凡人萍水相遭。逢場作戲。何足介意。若少時新婦之事。羅家郎又將何以為情乎。秦問少時新婦有何事。女曰。行當自見耳。有頃。驀聞人聲鼎沸。園樹皆紅。人出視之。則庖人失火。延及洞房。坊正官軍咸來撲救。親鄰漸集。蟻聚蠱屯。家口數十人。幸皆未寢。獨新婦與羅氏子。身無寸縷。股栗庭前。映着火光。纖毫畢見。二生不能正視。女乃至前。解羅衣裹之。掖歸別室。諸姑伯姊接踵來慰。搶攘間已失女之所在。眾以為隣女閨中去矣。惟秦褚二生知之。但緘密不言耳。自此褚無夕不與暗對。相得甚歡。然終未及亂。蓋褚既覩覩。而女亦有貞操。一似韋峯之與任氏也。及秦生從其父歸成都。女泣別。不復再至。又二年。顧死。褚扶柩歸鄉。未及獲雋。次歲成進士。工部觀政。未娶而卒。年甫二十有四云。

聞齋曰。酸子所以多妬者。窮其故。無他。閉戶守妻子。若將終身。本無遠大志耳。貞狐與褚。不過話言形色之間。涉於狎褻。書疑輒形諸色。何所見之小也。

蘭岩曰。守身貞見理明。出詞雅。此狐不多得。

鞠慕周最善說狐。不能悉記。其有奇者。足發一大噱。言其客關中時。因事之扶風。所識有丁孝廉者。年近四十。斷三弦。子女皆幼。號啼繞膝。不耐鰥居。仍謀膠續。屢乖所願。丁素究心神仙之事。精於導引。每澄心枯坐。吐故納新。輒見一黑狐對面蹲踞。瞠目相向。丁叱之。即刻奔逸。如此者屢矣。亦習不為怪。一夜方坐。覺有人登榻。與己並肩坐。衣香襲人。丁自念此皆妄慮所招。心不動。則魔何由生。任之可也。於是垂目息心。凝然不動。既而其人以頰偎腮。尋以口親吻。粉香脂膩。肌滑如脂。丁不能復耐。張目瞞之。則二八麗人。光彩耀目。晚丁而笑。丁曰。吾固知汝為向日狐。奈何擾人功果。可速去。否則惹老拳。非善知識矣。女猶掩口嗤嗤。俄延不去。丁躁甚。以足蹴之。顛墜牀下。旋即起立。忿忿整衣曰。魯莽如此。豈復讀書人行徑耶。兒去不復再來。汝其勿悔。丁鞠拱而謝曰。深感厚誼。敢云悔乎。女曰。從此雖焚香叩頭。祈我再至。恐亦不能矣。丁哂曰。永不敢起動矣。女不顧而去。越數日。丁晚浴於房。又見女寧相簾入。笑曰。我又來觀汝裸浴矣。丁不應。女蹲身其旁。以手撫之曰。背上垢厚二寸矣。我為汝擦之。可乎。丁心大動。睜間物翹然而舉。女格格笑不止。戲批其頰。作小響曰。何物書迂。輕薄乃爾。不怕污却人家女兒眼目耶。丁陰計學道人。豈可逞欲。況明知是狐。何故動心。因瞋目大怒。

奮拳揮之中鼻。女負痛滾地。唧唧哀鳴。衝簾而遁。繼此不復再至。丁家業素封。兒女雖各有阿保。而衣食會計。終苦內助無人。更囑冰人。徧覓佳偶。一日有媒媼來。言有卞大戶者。家貲百萬。一女十八矣。慧美賢淑。世罕其匹。君讀書人。多疑少信。固多以媒妁為妄。但免一女眷往相之。便足徵吾言不謬。丁以為然。央姑母及寡嫂同詣卞宅。門視動止。真仙中人也。欣喜而歸。盛誇其色。咸謂閱人多矣。未見有如此女之豔者。甯獨吾鄉。雖天下獨步可也。丁大悅。即日納聘。及奠鴈。親故滿堂。希冀一面。入房合卺。乍睹豔絕。審諦之非他。即鄰之孤女也。丁大駭。叩之女笑曰。兒非無益與君者。君道念已堅。成功可冀。然尚有要訣。不無夢夢。兒來當循循善誘。同登仙籍。不亦可乎。媒媼從旁攪說曰。姻緣自有天定。新郎無更拘泥。丁大怒。提屐多擊之。媼與女破窗而走。丁出戶逐之。已失所在。亟命燃炬大索。得諸廁中。成大嘩。並力奮擊。廁中人提褲驚呼。顛仆於地。燭之非狐。蓋丁之姪婦與寡嫂也。污穢滿身。傷痕徧體。舉室索然。舁之以歸。次日同往卞家。無復第宅。但見楸梧數本。古墓數坏而已。自此狐祟遂絕。鞠在秦與丁交厚。聞其自述如此。

蘭岩曰。人謂儒者多迂。而丁卒以迂而衛道。誠非真迂也。

薛魯園謂此皆不奇。奇莫奇于宛邱之狐矣。宛邱牧李公。有女及笄。風致嫣然。為狐所據。夫